

Riflession pe semblee anuâl da la clape di culture "Patrie dal Friûl" tignude ai 13 di Mai dal 2006 te sale li de tôr di Puarte Aquilee a Udin, sede dal "Consozî regjonâl pe protezion dai cjistiei storics".

UN'ANIME DI FIER

O sin intun edifici dal 1400 a cjâlâ il Friûl di vuê, intun'armonie tra passât, presint e avignî. O vin di cjâlâ dal alt, ma cence nostalgjiis, la vite di vuê.

Chi and è int diferente par formazion e par gjerarchie.

O viôt onorevui e socestants... Ma cui isal il plui grant?

Chel che plui al à tal cûr il Friûl e ch'al fâs miôr il so lavôr. Par nô e esist nome la gjerarchie dal amôr. Chel ch'al ame di plui la sô tiere,chel al è il prin.

Il Friûl si salve ancje cu lis struturis e cu lis autoritâts, ma si salve sore dut cuant che la int e continue a lotâ e a scombati. Par chel mo, i socestants e i studiâts, parie cu l'Universitât, a àn di ricognossi che se la culture no ven fûr da la tiere, da la storie e dal grim dal popul e devente erudizion e alienazion.

Cuâl isal alore il compit de int di culture? La int e prodûs e il studiât al elabore. Cussì ancje pe lenghe. La lenghe le fâs il popul, po chei altris a fasin i vocabularis e no àn di fâ i vocabularis e i libris e po imponiju a la int. Cu la buine volontât si pues ancje copâ la culture, fasint une lenghe artificiâl.

Dopo di vê cirût l'anime dal popul, i studiâts a àn di operâ par quartâle di un nivel subcussient al nivel dal cussient, parcè che tantis voltis la int no sa di vê un patrimoni e se no sa di vêlu e riscje di vendilu. La int no je stupide, ma il tacuin no lu bute vie. Parcè butie vie la lenghe e la religjon? Lis butin cuant ch'a pensin che la lenghe e la religjon no valin. Forsit par colpe di une memorie negative de puaretât. Ma no si è puars parcè che si fevele par furlan; si pues jessi puars ancje par anglês. La puaretât no je leade a la lenghe e compagn la religjon. Une volte a jerin puars percè che no vevin bêçs e parcè ch'a jerin sotans, ma no je la religjon e la culture che ti fasin puar, anzit a son la maniere par riscatâsi de puaretât.

Tal templi di Gjerusalem al jere dut stabil, al jere dut di marmul e di matereâi un grum prezios. L'uniche robe ch'è jere mobil e jere l'arcje che no àn mai volût fâle stabil ma simpri puartabil, parcè che la leç e à di cjaminâ cun nô, senò e devente un muart, un museu. Cussì ancje l'autonomie e à di jessi une robe vive, parcè che ogni moment, ogni popul, al à il so concet di autonomie.

L'autonomie di pre Checo? Nô o vin di vê il spirt di pre Checo e chel di pre Bepo, ma vuê il concet di autonomie al à di jessi un altri. Ogni gjenerazion e à frontât i siei problemis in mût origjinâl e adatât. E je une cuestion di elasticitât mentâl. L'autonomie di vuê e à di vê il spirt

di pre Bepo, il spirt di Marchi, ma l'autonomie e je diferente, parcè ch'a son coladis lis ideologjiis; o sin vierts a l'Europe; o podin tornâ tal grim di Aquilee cu la Slovenie... Une volte e jere un'autonomie autarchiche tai confronts dal stât talian, ma cumò nol è di stacâsi di Rome, al è di jentrâ ta l'Europe.

Jo o ven di Vençon là che cul taramot al è colât dut.

Il domo al è colât parcè ch'al jere biel, al jere grant ma nol veve fuarce avonde. Dopo lu àn tornât a fâ sù par anastilosì. A àn tornât a meti sù i tocs un parsore chel altri. Al è tornât chel di prime, parcè che ogni clap al è tornât al so puest. E tal mieç a àn metût un'anime di fier, par ch'è tegni dûr. Il Friûl al è stât costruît materialmentri come chel di prime, ma al à bisugne de anime par stâ sù. Cheste anime di fier e je l'economie e la culture.

O vin bisugne di une fuarte economia, parcè che cu l'economie cence culture tu cjapis i beçs ma no tu sâs mangjâju; e cu la culture cence l'economia tu fasis poesiis ma no tu mangjis. Al vûl chel e chel e, s'al è pussibil, un'economia ch'è partìs de culture e una cultura ch'è puarte l'economia, intune vision armoniche.

L'Universitât dal Friûl e varès di operâ par svilupâ cheste vision organiche e armoniche, ufrint culture e no erudizion e cirint di esplicitâ i valôrs da l'anime furlane. Pai studiâts al è rivât il moment di riscatâ il lôr debit dant a la lôr int, che in chest moment e je tant confusionade, orientaments vlevui no par jessi miôr di lôr ma par jessi a servizi di lôr.